

RAft ta for di mesa, pero supervision financiero ta keda!

E Consejo di Minister di Reino a bay di acuerdo cu retiro di e proposicion di Ley di Rijkswet Aruba Financieel Toezicht (RAft). E decision aki ta sigui e acuerdo administrativo cu a wordo firma dia 4 di juni 2024 entre e secretario di estado di Asuntonan Interior y Relacionnan di Reino (BZK) y e minister-president di Aruba. E acuerdo ta pone e base pa un ley di reino nobo riba finansa publico sostenibel y supervision financiero. Esaki ta nifica cu lo tin un ley di reino, pero den un forma modifica cu acuerdonan mas amplio riba maneho financiero y normanan presupuestario.

Antecedente: Acuerdo administrativo Aruba-Hulanda

Desde e entrega di e proposicion di RAft dia 9 di februari 2022 (36.032 (R2162)) tabatin hopi discusion riba e forma y alcance di e supervision financiero riba Aruba. Hulanda y Aruba finalmente a stipula den e acuerdo administrativo di 4 di juni 2024 cu e RAft existente lo wordo retira y reemplasa pa un ley di reino nobo. E acuerdo aki ta haci posibel pa Aruba beneficia di un interes mas abou riba e prestamonan di Covid y haya acceso na oportunidadnan di refinanciamiento faborabel.

Interes riba prestamo a baha

Un bentaha importante di e acuerdo tabat'e reduccion di e interes riba e prestamonan di Covid cu Hulanda a otorga Aruba durante e pandemia. E interes a baha di 6,9% pa 5,1%, locual ta duna Aruba espacio financiero pa inversionnan den su propio economia. E reduccion di interes aki ta posibel pasobra Hulanda cu e ley di reino nobo ta haya mas seguridad riba e estabilidad financiero di Aruba.

Normanan presupuestario y supervision financiero

E ley di reino nobo no solamente lo supervisa e finansa di Aruba, sino tambe lo contene normanan presupuestario cla y acuerdonan riba maneho financiero. Asina ta wordo stipula cua normanan Aruba mester aplica ora di traha presupuestonan y cual rol e College Aruba financieel toezicht (CAft) lo sigui hunga. Ademas, e ley ta percura pa posibilidad pa Aruba haci uzo di e condicionnan di prestamo faborabel bou di cual Hulanda ta cera prestamo. Pa establece e normanan presupuestario, un investigacion conhunto ta wordo efectua door di e Fondo Monetario Internacional (IMF). Aruba ademas tin e posibilidad pa lanta un propio Camara di Presupuesto como un organo di conseho p'e Staten y e gobierno. Cambionan den e regulacion nacional di Aruba sinembargo solamente por wordo efectua cu apro-



bacion di e Consejo di Minister di Reino.

Pasonan siguiente den e trayecto

E simannan venidero lo ta den cuadro di e elaboracion di e ley di reino nobo y e preparacion pa su introduccion.

E trayecto conoce e siguiente etapenan importante:

- **Di dos mita di februari 2025:** E Fondo Monetario Internacional (IMF) ta duna conseho riba e normanan presupuestario y e maneho financiero di Aruba.
- **Mas tarda 1 di mei 2025:** E proposicion di ley p'e ley di reino di finansa publico sostenibel ta wordo entrega na Tweede Kamer pa tratamento.
- **Despues di entrada na vigor di e ley di reino:** Hulanda ta baha e interes riba e prestamo di Covid mas ainda y ta ofrece Aruba oportunidadnan di refinanciamiento faborabel pa prestamo exterior.
- **Si e ley di reino no wordo acepta na tempo:** E interes riba e prestamo di Covid ta subi bek na 6,9%, locual lo perhudica Aruba financieramente.

Aunke e proposicion di RAft ta wordo retira, esaki no ta nifica cu Aruba lo keda sin supervision financiero. Al contrario, e ley di reino nobo lo inclui normanan presupuestario mas amplio y maneho financiero, cu cual tanto Hulanda como Aruba ta lucha pa un futuro financiero sostenibel y stabiel. Cu e introduccion planea di e ley aki, Aruba por beneficia di menos gasto di interes y un base economico mas fuerte p'e termino largo.

Fuente:

- *Decision di Consejo di Minister di Reino, 21 feb 2025*
- *Rijksoverheid.nl*